

中華民國三十三年三月出版

重修蘄縣志

仇錫廷題

仇錫廷

劉博泉

鄭蘭池

趙彤宣

徐葆璽

李午階


崔崇斌

王錫三

楊陸存

劉縣縣誌修纂委員會紀念攝影
十二月二十日





重修薊縣志序

薊縣於周爲燕國自唐開元十八年取古薊門之名析幽州之漁陽三河玉田三縣置薊州是爲縣得名之始千餘年來卓爲畿東衝繁縣有盤山南距滄溟西連太行東放碣石北負長城逶邐百餘里其突兀雄奇之氣磅礴邑內余前監司燕京嘗按視斯縣覽其山川慨然想見唐遼金清諸帝駐蹕之盛而緬然於往古郅治之隆與夫化民成俗之宜然則生乎百世之下而欲究夫百世之上之政教文物以爲施政損益之鑑徵文考獻詎可忽乎哉縣有舊志文淵閣書目所載薊州志薊州圖志天一閣書目遼史拾遺所引汪浦熊相兩志以及崇禎二年趙志康熙十七年董志均已久佚其存者如康熙四十二年張志道光十一年沈志亦皆陋略及時重修殆不可緩邑令徐君葆瑩惻惻吏也余因詔之曰縣志者一縣之史政教紀焉人物附焉食貨麗焉藝文存焉上足備國史之要刪下可徵一邑之文獻其用也宏修志之法會稽章實齋嘗言之其要者則勿以爲地理書而侈敘沿革勿以爲政書而摭列典制蓋方志者乙部之附庸采

訪欲周詮次必謹而資料期於豐美其旨也約徐君以余言謀於邑紳補志之事乃定
會余轉任津海徐君亦未幾以事去今年餘矣縣長陳君韜走津門來告書成且述鄉
紳之請曰志書之修李公實有以促成宜爲一言夫當茲變後修志之議余雖以爲急
務或有譏爲迂闊者矣乃縣長吏與諸搢紳先生依而行之使一邑之掌故備焉是或
盤山淑氣之所鍾獨厚於斯邑也耶吾知異日人文蔚盛必有爲他縣先者爰欣然而
爲之序

倉龍甲申二月大興李少微序

重修薊縣志序

薊屬漁陽古郡也屏翰舊京扼鎮邊塞歷代兵爭關係綦鉅民國三十年冬葆榮奉命

署薊下車伊始察政問俗夷考州志乃有清道光年間舊刊物也百年來事蹟湮沒久

失哀集據舊椽屬云於民國二十一年曾設重修志料徵集處由縣人劉君化風主纂

次年長城戰起因之中輟以所成者存交教育科適遭二十七年匪燹與縣署房舍同

燬於火劉君今已作古無可諮諏葆榮雖嘗以修復縣署編修縣志爲職志第以受事

方始百憂薰心萑苻未靖民望昭蘇三餘少暇未遑顧及翌年三月與縣紳會商組織

修建委員會興修縣署王君翰齋等董理其事遂飭材鳩工詎勉襄事宋棟櫨檣礎

之殘破者易之丹雘髹漆之漫漶者新之堂庭室舍之頽廢者興之締構堅貞規模掬

備閱半載而工訖縣署遂恢復舊觀而縣境禍亂亦稍稍戢止漸趨安謐矣又逾年春

敦聘仇錫廷楊陸存崔崇斌趙彤宣王錫三劉博泉諸君子爲縣志編修委員諸君子

者縣中績學士也昔哲有言修史之難無出於志誠以志者憲章之所繫風獻之所存

非老於掌故者不克勝任矧時遷勢異相距百年散帙無存傳說久湮近且政會改建制度嬗更鼎新革故事等肇基繼往開來復多制作迺諸君毅力堅定不辭辛勞從事綴輯半載觀成尤以仇君錫廷竭數月之力當溽暑之煩獨任搜集編校之役裨補闕略多所廣益然而編之成實網維之所繫治忽之攸關其於薊縣之收獲亦至大且鉅是則諸君之功業亦將與斯編永垂不朽矣是爲序

中華民國三十二年九月下浣雍陽徐葆瑩謹識於薊縣公署

重修薊縣縣志序

余於編輯里黨藝文之次年復擬續修薊縣縣志適知事徐公亦以此事爲急因請余師仇錫廷先生及本縣耆年碩德之儔勾稽逸聞蒐求掌故並於社會之變遷人羣之進化多所致意以期兩者文獻皆有益於社會人心冀挽頽風而杜亂萌計閱八月而此書體制輒備蓋上距道光中葉縣志絕續以來迄今已逾百年至是始克重續在此滄桑世變之秋得保地方史乘不墜尙不可謂非幸事也獨念吾薊十年變亂閭里爲墟推原禍始誰尸其咎往事不諫吾願自今以後薊人之披覽縣中文物能溯先賢之道義擯狂悖之邪說其於國家興亡世運隆替庶有多乎民國癸未重陽後十一日邑人李午階序

重修薊縣志序

薊邑古爲漁陽郡幽燕之名鎮也以山川靈秀之所鍾故文人傑士代出其間癸未冬余奉命來宰斯邑下車伊始適邑志續備藏事將付剞劂蓋邑有志猶之家有乘國有史也余既喜斯誌之編成爾後邑之山川文物有所徵攷而尤以於茲鼙鼓初息百廢待興之際一邑之文獻竟首觀厥成維持弗墜爲其他各邑所不見及故特樂綴數言以爲之序

中華民國三十三年一月元旦上饒陳韜序於薊縣政府

原志董序

一代之興必有一代之鉅典百世之治必有百世之傳書若是者非好勞而多事也天下大勢不能留渾噩而不文明古聖黷猷曷可令一時而不千載此古文韻字之所以垂素帛竹書之所以備恒使當世之士身不出斗室目不赴尺箋而天地之大古今之遙如鏡眉指掌之不可易記載之爲功顧不大哉故在國有史在郡有誌其規模廣狹有不同至於持綱紀勵風俗考時代之興廢辨政治之得失固屹然而莫之或異也然其間有誌而不誌不誌而誌者則又何以說焉自三代以往世降風漓以趨炎邀利之心矜含毫自得之意往往有敗絮其中而不妨金玉其外者卒之公道難揜愈蓋彌彰此誌而不誌之說也若夫上士逃名至人遯世固無論矣間有功德在世名姓失傳文獻空存幽馨難覓者偶得稗官野史之編村豎堯人之口蚌珠石玉光燄自若非所謂不誌而誌者乎是以誌之爲要取其實不取其名貴其確不貴其豔渾厚云美而勿失於包荒精詳宜務而弗鄰於粉飾斯爲世之足重也余自蒞薊以來暇披舊志上遡唐

虞遞及明末其得之於天者有朝霞晚翠之奇其得之於地者有巒峙泉流之致卽由人事觀之城郭宮室遠近巍峨疆畝塵林雲星錯落兼以忠臣孝子目不暇接烈士貞姬口不停頌誠洋洋乎大國之風也迨夫盛衰易故兵戰迭興風景雖存已非復彼都人士之舊矣近因聖代維新重修州誌詎非余之責也哉然猶未敢以自恃也尊國典則不得不禮師儒搜遺珍則不得不廣衆見欲求直筆則正人不可不親雅重宏詞則專司不可不慎至是而羣力畢協新書告竣矣詳其義意會其隱括較之前誌雖不無青出於藍之歎然有所因也而非襲青峯綠波百代常新有所革也而非儉滄海桑田變遷靡定有所增益也而非黜聖憐材慕義人有同心苦節純忠實難湮沒誌之大略盡此矣豈弟君子民之攸暨後之繼余而司土者倘有志於振綱肅紀易俗移風以復乎彼都人士之舊可不於斯誌而問津也哉

康熙十七年戊午孟午

奉直大夫知薊州事三韓董廷恩撰

原志張序

郡縣之有志猶國之有史也以一境之內山川田賦士習民俗與夫古今來可思可慕之人可激可勸之事莫不志之使後之觀風者有所採錄而爲政者有所考效焉則夫志之所繫亦重矣哉薊州古漁陽地也左扼山海右控居庸背連古北枕山帶河重關複阻實畿輔之屏蔽三邊之衝要也自我朝定鼎以來盛京遵化建立陵寢設防衛通漕運以是差徭絡繹應接爲艱而且風俗澆漓撫綏不易事日益繁地日益重官斯土者雖具宏才遠略能勿深慮乎歲甲戌余以三河令奉命來守茲郡凡六年而憂服南歸壬午之夏起復就補荷聖恩高厚再有薊州之命到郡之日復取舊志閱之乃康熙十八年董刺史廷恩所修定者至於今二十五年間因革事宜漫無稽考遂於案牘之暇用是究心繁者削之略者增之其中搜羅補綴覈舊訂新則郡人副貢崔顏等共勦纂記非余一己之心力所能勝任也嗟乎觀山川之險易則可以動保障之思觀田賦

蘇縣志
之多寡則可以愛厯養之慮觀士習民風之淳薄則可以施振興維挽之術上不負君親下不負民中不負己此爲父母者所當知也余因之有感矣桑無附枝麥秀兩歧此古之歌謠於國中者遺響猶存也彼何人歟而得人心若是使清風令名獨奮乎百世之上歟官斯土者可以思矣書成而序之以自勵并告後來之賢大夫共知此意焉

康熙四十三年正月上元日

奉直大夫順天府薊州知州加七級蕭山張朝琮撰

原志沈序

司牧之責成一州之政則易備一州之志則難政者謀於未然去其太甚謹持乎學校農桑之要善握夫人心風俗之原循而施之而治已易於報最矣若州之有志國家之疆域系焉經畫之因革詳焉賢奸之勸懲著焉民俗之淳漓彰焉與夫山川險要紀載統於形家亮節懿操坊表炳諸史氏以及冠婚喪祭樹藝旨畜之方懋遷有無化居市肆之叙一有罅漏不可以備參考而利規行又況薊自明季以迄我朝一百九十年來代閱滄桑事更轍迹援簡冊而搜攬每文獻之缺遺當此役者不綦難歟然創一州之志則難而因一時之舉則易莫爲之前雖美弗彰莫爲之後雖盛弗傳以爲無如何也幸前牧董君廷恩張君朝琮勒成此志而嘉慶庚午辛未間趙君錫蒲來刺是州又輯補之可謂盛而傳矣顧公餘繙繹見其搜羅稽覈疎失尙多而詳略之間亦欠考訂夫趙君應是囟囟去任未暇成書而余方司牧是邦豈敢自弛其責爰取全志刪其繁蕪

以歸簡要增其微細以冀詳明經始庚寅之秋告成辛卯之夏用繼董張趙三君之役而哀爲一編焉抑魯論有曰學優則仕吾人薄殖淺才漫膺民社操刀妄割竊陋貽羞今得此編讀之庶幾觀其川原風物覽其井牧里閭盡職業而興保障之思均徭役而善拊綏之術則因州志以成州政又何難易之分而創守之異哉其書以自勵而并望後之賢大夫知此意也蓋亦卽三君之志也夫

道光十一年辛卯仲夏

奉直大夫知薊州事歸安沈銳撰

薊縣志卷一

地理

薊於秦屬漁陽郡於唐虞夏后屬幽州冀州崆峒山有廣成遺跡又爲黃帝足跡之所經地雖處於朔方而草昧之開實不後於雍豫山有田盤其深邃幽窈不減匡廬水有沽洵其運轉輸給豈讓潮白鑛藏深富厥田中中毓山川之靈秀沐聖哲之休風以生以殖以佃以漁風霜閱遍大地常新吾人一登高而望遠一臨深而俯察則篳路藍縷以啟山林我先民之締造艱艱以遺厥子孫者殆可想像而得之況長城起伏於巉巖峭谷之間示我以偉大者尤有跡像可尋乎爰志地理

疆域

本縣居北緯四十度五分經東五十九分

以北京爲經度起點

面積約一萬零四百三十方里

此數由估計而得不甚翔實

東接興隆遵化玉田三縣東北以黃花山與興隆縣分界山距城四十五里正東以淋

河與遵化縣分界淋河自東北斜趨西南以淋河莊爲中心距城四十五里再南則燕山口爲薊遵玉三縣接壤之地距城六十里燕山口以南有螺山梅家屯香春園十六村交錯於玉田縣境距城六十里又南則以藍泉河爲薊玉二縣之交界

南以運河洵河與寶坻縣爲界運河之白龍港距城六十五里洵河南岸之西南一角李善人莊張仙莊刁新莊爲薊屬而又爲薊寶三香四縣之交界處距城七十里

西接三河平谷兩縣洵河界三薊之交河西只掠馬村爲薊屬正西以段甲嶺鎮街中界石爲界距城五十里西北以老爺嶺與平谷縣爲界

北以長城爲界西端接密雲縣界距城一百餘里東端接興隆縣界距城六十五里東北接興隆縣治八十里東至遵化縣城一百二十里東南至玉田縣城八十里南至寶坻縣城九十里西南至香河縣城九十里西至三河縣城七十里西北至平谷縣城七十里北至黃崖關五十里西至北京一百八十里再西至保定省城五百一十里西南至天津二百四十里

按舊志北界黃崖關關爲長城口之一有城清設千總駐守兵額經減爲八十五名